

JA NØKY MIDI YIKTANĴJA'AYĪDØØ JA HEBREOS JAA'DYĪ

Dios U'nk køjxp adøm ja Dios Teety xmiġajpxyim

¹ Janch tigach idø'øn ja Dios Teety y'ijty ñanky'ijxyiyi, ku dø'øn ja kyugajpxy ttuknijawiwya'añ pøni ti jaty idø'øn ja tyukmadowampy ja møjaa'dyøjkti. ² İxyammim idø'øn ja kyø'øm U'nk kugajpxy tø tkexy. Y'U'nk køjxp idø'øn ja Dios Teety ojts tuki'iyi tyik'øyi ja naajx jøts ja tsajp, jøts nay ja y'U'nk tø ttagidøjkiguixy køx kida'ak midi ja wyinaty tø tyik'øyi. ³ Ja Dios U'nk idø'øn tnanky'ejxip ja Dios Teety ja myøj'ajtın, jøts nayi ja' ja tnanky'ejxip sa dø'øn ja Dios Teety t'ixy; nay ja'ats ja myøkwinmaa'ñ ja myøk'ayuujk tpatanaagyøjxp tuktsajp'agida'aky ja pikta'aky midi ja Dios Teety tø tyikøjy. Ja Dios Teety ja møøt yikutuky y'aga'ngyøjø'øm jam tsajpjotp, ku adøm ja ya jawyeen tø x'ukyikpojkipiwaajchim.

Jawaani møj ja Dios U'nk, ka'ap ja ankilis jade'endi

⁴ Tø ja Dios U'nk jawaani møj wyimbidsimy jøts ja Dios Teety y'ankilis ne'egi ka', ja'agøjxp ku ja Dios U'nk tø tmidañ jawaani møj ja kutujk. ⁵ Jabi niĵuunixi ja Dios Teety tkanimaay tu'uk ja y'ankilis yide'en:

Mets idø'øn n'U'nk'ajtpy;

øts mets ja jujky'ajtin ti nmø'øy,
 ni ja Dios Teety tkanimaamyi tu'uk ja y'ankilis:
 Øts me n'u'nk'atp,
 jøts øts me xeety'atp.

⁶ Yide'ents tø wyami ku ja myøjtu'umts U'nk tø
 xaniguejxyim ya naxwiiñ:

Wan niduki'iyi øts ja n'ankilis mwindsø'øgyi.

⁷ Ku ja y'ankilis tñimadyajkmi, yide'en ja Dios
 Teety wya'añ:

Øy øts ja n'ankilis o sa nnanky'ejxyit,
 nayide'en sam ja pojín, uk sam ja jøøn yowín.

⁸ Kuts ja y'U'nk tñimadya'aky yide'ents ja
 tñimaamyi:

Xemikøjxp me Dios U'nk mgutujk y'ity;
 tiy mets mgutujk ja mdiidyu'unin y'ity.

⁹ Mdsøky'ajtpy mets ja tyiiby jøts ka' x'ejxwa'añ ja
 ka'øybi;

paty ja mDios Teety jawaani øy ja jotkujk'ajtin tø
 mmø'øyi,

jøts ni ka'ap jade'en o pøn tø yiktuñ.

¹⁰ jøts nayide'en wyami:

Mets Dios U'nk, tø xanibiktaajkguixy tuki'iyi ku yø
 naxwii'ñit tø xyikøjy,

jøts mgø'jotp ja tsajp tø pyidsimy.

¹¹ Køxtip naxtip yø', jøts mets xemikøjxp me mdañ.

Nayide'en yø yjattit sam wet pyachi;

¹² jøts mets ja xpøkjø'økt ane'eky ade'kxy, jøts
 jadigojk xyikjemyit xyik'øyit.

Mets idø'øn xemikøjxp jade'eñim m'ejtp, nijuuni
 xøøw mets mdsinaa'yin kyakixy.

¹³ Jøts nijuuni ja Dios Teety tu'uk ja y'ankilis
 tkanimaay:

Ya yikutuk n'aga'ngyøji'jy,

kunimts mets mmidsep nduktekpya'an'att.

¹⁴ Dios Teety idø'øn myidundip niduki'iyi ja ankilis, nayi Dios Teetyts kajxidip jøts tpuðøkidit pøn jaty ja nitso'ok'ajtin tkupøkwandip.

2

Ka'ap ja nitso'ok'ajtin ngamøjpihtaajkin

¹ Ja'agøjxp idø'øn nyikmøja'am nyikøjxpa'am pøni sa tø nmadø'øyim jøts kidi ja nwinmaa'ñ nyiktigajchim, tu'ugyi ja nyikyø'øyim. ² Tø dø'øn ja ayuujk yjanchwindiy midi ja ankilis ja israelit jaa'y tyukmadowdi, pøn jatyts ja tkabadundøø, yiktiidyundi ja', jøts ja ayo'on yikmøødyøø sam idø'øn pyaat'atyiyi. ³ Pøni jade'endam ja yjajttøø, ¿sudsots adøm idø'øn ndejint nga'ayo'ombaajtindit pøni ka'ap adøm ja møj nitso'ok'ajtin nmøjpihtaajkyim? Jabi jawyeenxi ja nwindson'ajtim kø'øm tø tniğajpxy, pønts ja tpatmadoojidøø, tøts ja ayuujk ja jawyeen tiibyøkti jøts ja tø ttsøønidi, jitsnim øøts ja tø xukmadøy. ⁴ Tøts ja Dios Teety nayide'en kø'øm tyaky ja ejxpajt ku dø'øn ja y'ayuujk ja wyindiy, ku ijxyimbi ka'ijxyimbi tyiknaxkida'aky, nayide'en ja Dios Espíritu Santo tø xmø'øyim ja møk'ajtin sam ja kija' tø xamidsøjkyim.

Nayide'en ja Jesucristo yjaa'yajty sam ja myigu'uk naxwii'ñit jaa'y

⁵ Ja tsinaa'yin ja jujky'ajtin midi memp ja'tp Cristo køjxp, midi øts ixyam nnigajpxpy, ka'ap ja ankilistøjk ja mibaat tniwindsøn'attit. ⁶ Jabi yide'enxi ja David ja Dios Teety t'ajot'aty jøts ja tø tjaadyañ:

¿Tymbyøn idø'øn yø jaa'y'ajtp ku yø niw'ine'en
xkaja'dyigøy?

¿Ti tymbyøn idø'øn yø naxwii'ñit jaa'y midi oo'kp
tigøøpy ku yø xmi jotigøy?

⁷ Tø yø waani x'atsyik'amutski jøts tø
x'at smøjpikta'aky ja m'ankilis,
ixyamts ne'egi jawaani møj tø xmø'øy ja møj'ajtin
jøts ja øy'ajtin,

⁸ jøts tuktsajp'agida'aky tyikutujkøxt.

Ku dø'øn ja Dios tuki'iyi tø ttagidøjkiguixy ja
jaa'y, niti dø'øn ja tø tkayiktañ midi ja jaa'y
kya'ana'amp. Ots ja yjade'eni, ka'anims
adøm n'ijxyim ku tuki'iyi myimadooguixyi.

⁹ N'ijxyindipts adøm ja Jesús pøn ja Dios Teety
waani tø t'atsyik'amutski, ni ja ankilis tø
tka'at smibaat'aty. Tøts ixyam tmøøgyojmi ja
møj'ajtin jøts ja windsø'jkin jawaani møj, ja'agøjxp
ku ja o'jkin ja tø tkupiky, ku ja Dios Teety ja jade'en
tø tyamidsøkyiyi jøts adøm ja xku'o'jka'ant.

¹⁰ Dios Teety køjxp tuki'iyi y'ijty, jøts tum ja'
idø'øn paat'ajtiyip; ja'ats ja Dios Teety chøjkpy
jøts nayide'en ja y'u'nk ja myaay tpaattit ja
øy'ajtin. Paty idø'øn ja Dios Teety tø ttamidsøky
ja nwindson'ajtim Jesucristo jøts ja y'ayo'owin
jøts ja y'o'jkin jade'en ttuktabaja'ñaxy, sa dø'øn ja
naxwii'ñit jaa'y y'ejxiidi tyiyidi, jits jade'en jawaani
øy xukja'gyukant sudso ja nitsoojkin nbaajtint.

¹¹ Jabi nay ja'axi ja tyeety'ajttip pøn jaty tø
pyojkpiwa'atsti, jøts nay ja'ats ja tyeety'ajtmip pøn
yikpoj kpiwat sp. Paty ja Dios U'nk tkadatsø'ødyuñ
ku adøm ja xmiga'axa'am, ¹² sam jap wya'añ
nøkyjotpy:

Mets Dios Teety idø'øn nnimadya'akp ku øts ja
nmiga'ax nmigajpxt,

jøts tu'ugyi øø wyinaty n'iy mets køjxp.

¹³ Jøts nayide'en jap jaabyety wyami:

N'awejx'etp øts ja Dios Teety.

Jøts abiky ñømgøjmi:

Ëxyam ø møøt n'u'nk n'unajk, midi øts ja Dios Teety
tø xmø'øy.

¹⁴ Jade'en sam ja naxwii'ñit jaa'y ja jujky'ajtin
tmøøt'ajttøø, ja'agøjxp idø'øn ja nwindson'ajtim
Jesucristo yjaa'yjajty jøts jade'en ja o'jkin
tkupøkt, jøts jade'en tmimajada'aky ja miku'
midi ja o'jkin tnwindson'ajtp. ¹⁵ Jade'en ja

nitso'ok'ajtin xuktajotkujk'ajtint jøts jade'eñi
dø'øn ja o'jkin nga'uktsø'jkiñant. ¹⁶ Wa'ats

yikja'gyuki ku ja nwindson'ajtim ja' tkanimiñ
jøts ja ankilis tpudøkit, jabi tum naxwii'ñit jaa'yxi
ja ja'ayi ñimimpy, pøn teety'amøjkojpk'ajttip ja
Abraham. ¹⁷ Ja'agøjxpts ja nayide'en yjaa'yjajty
sam ja myigu'uk naxwii'ñit jaa'y, jøts jade'en
t'ayo'ext sam nayide'en ja Dios Teety tpadun'ett,
ku ja kyø'øm o'jkin ja ttayikpojkiwa'ach ja
naxwii'ñit jaa'y. Ja'agøjxp idø'øn ja amuum
ndeety'ajtyindi. ¹⁸ Tø dø'øn ja jawyeen ttanaxy

ja ayo'on, ja winmaa'ñ, jøts nayide'en yikxon tø
yikwinmaa'ñ'ixy, paty idø'øn myayi ja pudøjkin
pøn jaty nayide'en ya jajtíp kubajtíp.

3

Jawaani møj ja Jesús, ka'ap ja Moisés

¹ Kunuu'kxy mee migu'uktøjkti, meetspi
dø'øn mbaat'ajtiyip jøts yikxon x'ejxtit ja

Cristo Jesús, pøn tø nyiktaniguexyindi jøts pøn ndeety'ajtyindip, ja'agøjxp ku meets idø'øn ja Dios Teety tø mwi'ijxyidi jøts ja mja'atiyidit. ² Ejtp ja Jesús tiy ja Dios Teety tmimadøy pøni ti ja tø tyaguwaniiyi, sam ja Moisés nayide'en tu'ugyi tmiduun ja Dios Teety ma ja janchja'wibi jamdi. ³ Jawaani møjts ja Jesús ja wyindsø'jkin pyaadyi jøts nika' jade'en ja Moisés, nayide'en idø'øn ja tpaaty, sa jawaani møj yikwindsø'øgi ja tøjkojpi jøts nika'ap ja tøj jade'en. ⁴ Ots idø'øn ja jaa'y may yjadøjkojti, tum ja Dios Teety tuki'iyi tø ttanibiktaagi wine'en ijty tuktsajp'agida'aky. ⁵ Janch øy idø'øn ja Moisés yjatuun, ku ja janchja'wibitøj ttukmadøoy ja Dios kyajpxy y'ayuujk, pøni ti dø'øn ja wyinaty tyunwampy ja Dios. ⁶ Tu'ugyits adim ja Cristo xpawinmaa'yim wine'en adøm njanchja'wa'am, ja'agøjxp ku ja tkøjø'ømit'ajtkixy, pø Diosxi ja' ja y'u'nk. Ja' tsojkip jøts møk ja winmaa'n nbiktaajkint, jits jotkujk n'awejxint ja øy'ajtin midi memp midi ja'tp.

Ja janchja'wibi pyoo'kxinxøøwdi Dios wyingujk

⁷ Paty yide'en ja Dios Espíritu Santo wya'añ, sam jap jaabyety y'ity nøkyjxpy:

Pøni mmadøøpy meets ja Dios Teety kyajpxy ixyam,

⁸ kidi jade'en mgujuun'atti sam ja jaa'y ttundi jam abak etjotp, ku tkagupøjkti ja Dios,

jøts ja yujy'ajtin nugo ttaguyajtidi.

⁹ Jam øts idø'øn ja m'apteety m'aptaak xwinmaa'nmyøk'ejxti,

øyi ja tja'ejxti tjanija'widi ja ijxyimbi ka'ijxyimbi
wixijkxy jumøjt midi jaty øts jam njatungu-
najxpy.

10 Paty øts idø'øñ n'atsemi'ambøjkti,
winets ø nwaañ: “Ejtp mee mjadigøy
m'anmija'wingøjxp,
jøts ka' xtsojkti jøts øts ja nduu' xpaduujnidit.”

11 Ja' øts idø'øñ ja ndami'ambøjkti, jøts ø
nwandaajky ku kyatøkidit mā øts ja
n'uktamidsojkti.

12 Migu'uktøjkti, nay'ejx'etidim tu'uk jadu'uk,
jøts xkamajsttu'uttit ja Dios ja yikjucky'ajtpi, jøts
ja' ejtp xjanchjawidit. 13 Nay jaakjamnim ja xøøw
ja jumøjt, nagyajpxjot'amøjkiyidi xem yam jabom
jabom, jøts ja pøky mgawin'øønidit, jøts ja Dios
ejtp xmimado'odit. 14 Pøni tu'ugyi nyikyø'øyim
ja janchja'win pøni sa ja tø nyiktso'ondaajkyim,
kuwani ja Cristo møøt nbaajtin ja øy'ajtin.

15 Paty xja'myatstit ku ja ayuujk wya'añ:
Pøni mmadøøpy meets ja Dios Teety kyajpxy
ixyam,
ka'ap nayide'en mgujuun'attit sam ja
ttundøø pøn ja Dios Teety tkamimadoodøø.

16 ¿Pønts idø'øñ ja Dios kyajpxy tjamadoodøø
jøts ja tka'ukpadunidøø? Ja' dø'øñ jade'en
adøtsti pøn ja Moisés yik'awa'atspidsøøm jam
Egipto etjotp. 17 ¿Pønts idø'øñ ja Dios myijotma'jt
wixijkxy jumøjt? Ja'ats idø'øñ jade'en jajttøø
pøn jaty pøkyundi, jøts ja jamyi abak etjotp
y'oo'ktøø. 18 ¿Pønts idø'øñ ja Dios tyamiwandaajki
ku ja kyatøkidit mā dø'øñ ja Dios wyinaty
tø y'uktamidsøkyidi? Ja' dø'øñ ja'adi pøn
tkamimadowdi ja Dios. 19 Ixyats adøm n'ijxyim,

ja'agøjxp ja øy'ajtín ja tkapaattøø ku ja Dios ja tkamibøjktøø.

4

¹ Ka'aním ja tpaaty jøts adøm ja Dios Teety nmøøtnøjkxna'ant poo'kxpi, paty idø'øn tsø'øgi jawi ndsinaa'yinditnim ja ku wyinaty pøn nidu'ugin kyanaxy.

² Nayide'en adøm tø nyiktukmadø'øyim ja nitsoojkin ayuujk, sam ja møjaa'dyøjk yjayiktukmadowdi; ka'apts ja ti øy'ajtín tpaatti ja kuxi ja tkamibøjktøø øy ja tjamadoodøø. ³ Adømts idø'øn ja Dios Teety møøt nbaajtint ja poo'kxin ku adøm ja tø nmibijkyim, jabi yide'enxi ja Dios kø'øm tø wya'añ:

Ja'agøjxp øts idø'øn ja nmi'ambøjkti ku øts ja xkamibøjktøø,
jøts øts ndyimñimy ku nijuuni xøøw xkamøøtpoo'kxtit.

Jade'en idø'øn ja Dios wya'añ, øy ja wyinaty ja tyunk tø tjayik'abajtyini ku ja wyinaty tuki'iyi tø tyikojkixy, jøts t'agajpxujky jøts ja tpaattit ja poo'kxin pøn mimadoolip; ⁴ pø japxi nayide'en jaabyety y'ity ti dø'øn ja Dios Teety tyuun kyiwixujk xøøw:

Poo'kx ja Dios kyiwixujk xøøw ku ja tyunk tyik'abajtyiñ.

⁵ Jøts nayide'en jap jaabyetyimi:

Ka'ap øts ja xmøøtpoo'kxtit pøn xkamibøjktip.

⁶ Ka'aním ja jaa'y ñiga'pxidi jøts tpaattit ja poo'kxaajk, øy ja tø tjamadowdi ja nitsoojkin ayuujk, ka'ap ja poo'kxaajk ja tø tpaatti ku ja tø kyamadowdi; ⁷ paty ja Dios Teety jadu'uk ja xøøw ja et tø tnigajpxy midi adøm ixyam n'ijxyindip

ndsinaa'yindip, jabi Davidxi dø'øn ja Dios kyajpxy yiktumpy ku ja wya'añ sa jap jaabyety y'ity nøkyijxpy:

Pøni mmadøøpy meets ja Dios kyajpxy ja y'ayuujk, kidi xkamibøkti.

⁸ Ku ja Josué jeexyip ja israelit jaa'y ja poo'kxin ti tmøøñi, ka'ap ja Dios Teety jeexyip jadu'uk ja xøøw ja et tnigajpxy ma ja poo'kxin yikyakt.

⁹ Patyts idø'øn y'awejx'ityiyi ja kunuu'kxy poo'kxin, niduki'iyi pøn ja Dios tjanchja'widip.

¹⁰ Pøn ja Dios Teety møøt pyøø'kxy, nayi tø ja wyinaty ya naxwiiñ tyikixy ja y'ødyu'unin. Jotkujk idø'øn ja pyoo'kxnit sam ja Dios pyøø'kxy ku tyik'abajtiyi'ñ ja tyunk tuktsajp'agida'aky.

¹¹ Kuwanits nmijotigø'oyindit jøts ja'abi poo'kxin nijum nbaajtindit, jøts nipøn tkabadu'unt ja jaa'y pøn tkamibøjkti ja Dios.

¹² Jabi xemikøjxpxi ja Dios Teety y'ayuujk y'ity, jøts jawaani wenk yiktsaachi myøk'ajtingøjxp, niti tsujx adsow jøpi jade'en kyayiktsaachi, ja kuxi tyimya'aty anmija'winjotp jøts jade'en tnanky'ijxyiyi pøni ti yiktunwamp uk yikwinmaa'ñ'ajtp.

¹³ Niti dø'øn ja Dios tkayu'uchjawi, tyumni'ija'wigyijxpy ja' tuki'iyi jøts ja' idø'øn wyinaty nwinguwa'jka'amp jøts ndsinaa'yin ndagidøjkant.

Ja Jesucristo idø'øn tu'uk møjteetywindsøn

¹⁴ Ja Jesús midi dø'øn Dios U'nk'ajtip, ja' adøm idø'øn njawanimøjteety'ajtyindip, ja'ats idø'øn ja Dios Teety tø twinguwa'agi, paty adøm idø'øn ja nDiosja'myajtsin møk nyik'ejtint.

¹⁵ Xja'gyuka'amp adøm ja Jesús midi dø'øn

møjteety'ajtp, ja'agøjxp ku ja tñijawi sa adøm ndsinaa'yim ya. Pø tøxi ja nayide'en ja ka'øwyinmaa'n yjayikmø'øy jøts ja tø tkagupiky, jøts jade'en ja pøky tø tkatuñ. ¹⁶ Tja'myejchims ja Dios, jøts wan tñinijkxyim jotkujk jøts n'amido'owint pya'ayo'owingøjxp ja pudøjkin ma ngamajadaajkyim.

5

¹ Wi'ijxy idø'øn jam israel kajpkøjxp, tu'uk jadu'uk ja teety, jøts tø yikpikta'aky jaa'gyudanaabyi, jøts ja jiyujk'øøky ja Dios ttawindsø'øgidit ttawinjawidit jøts idø'øn ja jaa'y pyøky ñiwa'adsiyit jøts ja Dios tmaa'kxt. ² Kumi nayide'en yø teetyti pyojkpitumbijaa'yidi, paty yø tja'gyukidi pøn jaty tsuj kadsinaadyip jøts pøn jaty tundigøødyip; ³ ja'agøjxpts idø'øn ja wyindsø'jkin tpikta'akti ku ja nayide'en pyojkpitumbijaa'y'ajtti, jøts ku ja jaa'y tkudanidi.

⁴ Nipøn ja kø'øm kyananktyeetyidsimy; ja Dios Teety idø'øn ja møøjyip, jøts nay ja' idø'øn tkunuu'kxp tkuwamp sam yiktuñ ja Aarón pøn myidu'ukpi möjteety'ajti ja israelit jaa'y. ⁵ Nayide'en yjajty ja Cristo; ka'ap ja kø'øm ñankmyøjteetyidsøjmi, ja Dios Teety ja møøjyi ku dø'øn ja ñimaajyi:
Mets idø'øn n'U'nk'ajtpy;

øts mets ja jujky'ajtin ya tø nmø'øy.

⁶ Jøts ku nayide'en ja Dios Teety wyaamaa:

Mets idø'øn xemikøjxp möjteety'atp,

jøts jade'en mdu'unt sam ja Melquisedec ttuñ.

⁷ Møk ja Cristo ja Dios Teety twingajpxajky tminuu'kxajky ku ya chinaay naxwiiñ, jøts twinjiiy

twinyaaajxy ja Dios Teety, midi tmøøt'ajtp ja kutujk jøts ja o'jkin tkapaatt tka'ext, jøts ja Dios Teety myadooji ku ja tu'ugyi yikxon t'ajot'aty. ⁸ Kuwani dø'øn ja Cristo ja ayo'on tkupøjki sam adøm, øy ja yjaDios U'ngi, kuwani ja tø tnanky'ijxyi ja mado'owin; ⁹ kuts ja jade'en tja'gyukiyi'ñ ja naxwii'ñit ayo'on, jade'ents tmibaat'ajty sudso ja yiknitsoojkin ka'pxy tmo'ot pøn jaty ja mimadojiyip, ¹⁰ ja'agøjxp ku møjteetywindsøn ja Dios Teety wyinaty tø pyiktaajkniiyi sam ja Melquisedec y'ijty tyeety'aty.

Yik'ejxtip ja janchja'win ku ja jotmøñ yikmajt-stutnit

¹¹ Kajaanim ja kyayiknigajpxy ya'atpi ayuujk ja'agøjxp ku meets yjaw i xkaja'gyukiwya'añ, jade'en'ampyts inet idø'øn ja yjaw ngajatt sudso ndukmado'odit. ¹² Meetspik idø'øn jeexyip mdukyikyuujnidiip ja mmigu'uktøjkti, kawinaak xøøw ja m'ixpøjkin xjayikyø'ñidi jøts ni jade'enbaat xkaja'gyukidinim ja ixpøjkin midi ka' mabaat chepi. Ne'egi jade'en meets yjaw mwimbejtni sam ja mutsku'nk ja'ayi ja che'tsknø tkupiky, jøts ka'ap ja kaaky ja tojx ja ttsøky. ¹³ Maxu'ngin idø'øn ndejint wyinmay pøn tkaja'gyukipnim sudso n'øchinaa'yint, kuts ja nduk'ixpøkwa'anin midi niwyaani tsep ka'ap ja tkupiky, nayide'en idø'øn ja' sam ja maxu'nk ja'ayi tkupiky ja che'tsknø jøts ka'ap ja wenkpi jii'kxy. ¹⁴ Pønts tjaajtnip t'ixa'at ja øybi uk ja kya'øybi, ja'ats ja Dios y'ixpøjkin tnijawiwyangøjxp øy ja wine'en yjatsepi jøts yikja'gyukit.

6

1 Jade'en nyiktaa'nint pøni ti jaty jawyeen tø nyiktukmadø'øyim, ku ja Cristo tø njanchja'wa'am, jøts ja Dios yja' njaaknija'wigyojint jøts ja ja'gyukin nmøøt'ajtint. Ka'ap ja nugo ngajpxjimbejtint ngajpx'adøjint sudso nmajtstuujtint ja ka'øy chinaa'yin, midi ja o'jkin tukpaṭp, jøts sudso ja Dios njanchja'windit, 2 jøts pøni ti dø'øn nøbajtin'ajtp, pøni sudso jaa'y tkunuu'kxy ja myigu'uk, jøts sudso ja jaa'y yjujkpyøktit jadigojk, jøts sudso ja tiidyu'unin y'ett. 3 Paty adøm nja'uknijawigyojint pøni ti jaty yiktukmado'owimp, pøni jade'en ja Dios xamidsøjkyim.

4 Ku pøn jaa'y tuk'oiky i tø ttajotkujktøki ja Dios y'ixpøjkin, ku ja Espíritu Santo tø yikwijyidi yikejyidi 5 jøts ja Dios kyajpxy nekim tø t'ukupøkti, jøts nayide'en tø tyatøkiyidi ja Dios chojkin ja myøk'ajtin midi ixyam jøts midi xemikøjxp ejtp. 6 Pøni tø ja tjä'dyigøydi ja Dios jøts ja kyø'øm ka'øchinaa'yin ja tø t'awimbetidi jadigojk, nisudso ja kya'ukjotimbejtnidit ku ja Dios U'nk ja kyiruspajtin jade'en nugo ttaguyajtidi, jits ja nugo o magama ttaxe'ekti. 7 Jade'ents ja yjatti sam ja naajx ku tyu'uy, y'uktichp nøø, kuts ja pikta'aky jam yikxon y'ity jøts ja tyikjotkujk'aty pøn jaty tø ñe'epti. Dios idø'øn ja kunuu'kxip ja naajx. 8 Kuts ja pikta'aky ja tkayik'ity, ku nugo ujts jøts kujp tyik'ity, tits ja wya'ant, ka'ap ja y'øyi. Mi'ambøjkips ja Dios ja' jøtsnim ja yiknitsa'att.

Jade'en idø'øn ndejint ja naṅwii'ñit jaa'dyi.

Ja awejx'ajtin midi jotkujk xyik'ejtimp

9 Ots ø migu'uktøjk jade'en njakajpxy, njanchja'wipts øts, ku meets ja Dios tø mgunuu'kxyiyi, ku tø myikmo'odi ja nitso'ok'ajtin. 10 Pø janch tixxi ja Dios jits ka'ap ja mdajaa'dyigøyidit pøni ti jaty meets ja tø xuujni, jøts ku ja tø xuk'ejxti wine'enin ja xtsojkti, ku ja mmigu'uk midi nayide'en tjanchja'widip ja Jesús tø xpudøkidi, midi meets ixyam mjaaktun'adichpñim. 11 Ja'ats øø ndsøjkpy, jøts meets jade'en mdsinaa'yin xyikyø'ødyit jotkujk jøts tsuj, kunim ja øy'ajtin xpaattit midi m'awejxtip. 12 Ka'ap øø ndsøky jøts mee mnuux'ookt, ja' øø ndsøjkpy jøts ja jaa'y xpa'ejxtit pøn jaty ja øy'ajtin tpaattip y'awejx'ajtingøjxp ku ja Dios tjanchjawidi.

13 Jade'en ja møjaa'y Abraham yjajty ku ja Dios tyamini'adso'owiyi ja øy'ajtin. Kyøøm jujky'ajtin ja Dios tyakajpx, ja'agøjxp ku wyinaty nipøn jawaani møj kya'ity; 14 xjats yide'en ja Abraham yiknimaa'y: “Ngunuu'kxp mets, jøts ja m'u'nk m'ap nyiknamayit.” 15 Tuda'aky ja Abraham ja t'awejx'ijty midi idø'øn ja Dios ñigajpx, jøts ja Dios ja myøøjyi midi wyinaty tø tyamidsøkyi. 16 Ku jaa'y tigati ttamøjtøkiwya'andi ttajanchtøkiwya'andi, ja' ja y'agajpxtip pøn jawaani møj, jøts ja nisa kya'ukyiknimaa'ñidit. 17 Paty idø'øn ja Dios ojts ja kyajpxy tyimyiktañ, jøts ja yikjanchjawit ja y'ayuujk, jøts ku ja tuki'iyi tpadu'unt pøni ti jaty ja wyinaty tø ttamidsøky ja jaa'y. 18 Majtsk idø'øn ja winmaa'ñ midi ja Dios myøøt'ajtpy jøts ka'ap ja taay'ajtingøjxp ttuñ; tu'uk ja wyandaajkin midi adøm idø'øn xamidsojkimp, jøts tu'uk ja

kyajpxy y'ayuujk midi ja awejx'ajtin xmø'øyimp ku ja wyandaajkin ja tpadu'unt. Jade'ents adøm ja Dios xyikjotkujk'ajtyim, jøts n'awijxyimpts adøm pøni ti dø'øñ xmø'øyimp. ¹⁹ Ya'at awejxin adøm idø'øñ ja n'amija'win tu'ugyi xyik'ejtindip, sam ja kudibyajt tu'ugyi tyik'ity ja pikta'aky, midi'its adøm idø'øñ nadyagumajtsa'amp jøts adøm ja Dios nbaajtint. ²⁰ Jam idø'øñ ja møk y'ity tsajpjotp mā ja Cristo jawyeen tø tyøki jøts ja tuu' tyik'awa'atst, jøts idø'øñ ja jade'en xemikøjxp tø tyañ møjteetywindsøn sam ja Melquisedec.

7

Nayide'en ja Jesús tyeety'aty sam ja Melquisedec

¹ Salemit windsøn idø'øñ y'ijty ja Melquisedec jøts ja tsajpjotp Dios tñideety'ajtmi. Kuts idø'øñ ja Abraham wyinaty ja myidsep tø tmimajada'aky ixats idø'øñ ja Melquisedec ojts y'atSPAatsøyi jøts kyunuu'kxi. ² Jøts ja Abraham tmøøy tukpiky ja majkpikpyi pikta'aky pøni ti jaty idø'øñ ja wyinaty tø t'atSpiky. “Ka'pxy tñidyumbi windsøn” idø'øñ ja Melquisedec y'ayuujkpidsimy; kuts ja tñiwindsøn'aty ja Salem kajp midi tyijpy “jotkujk'ajtin”, ixyats ja Melquisedec wyimbidsømni “ja windsøn pøn kyajp ttamidsojqp ja øy'ajtin jøts ja jotkujk'ajtin.” ³ Ka'ats idø'øñ ja tyeety tyaak ja pøn, ni myigu'uk; ku dø'øñ ja ñanky'ejxpaahti, ni kyayiknigajpxmi ja kya'axin jøts ja y'o'jkin; paty idø'øñ ja Dios U'ngin t'ixy, ja teety midi xemikøjxp teety'ajtp.

⁴ Janch møjts idø'øñ ja Melquisedec wyimbidsimy, ku dø'øñ ja Abraham, midi adøm

ndeety'amøjkojpk'ajtyindip, ja tmøoy tukpiky ja myajkpikpyi pikta'aky midi ja wyinaty tø t'atspøjksi ja myidsep. ⁵ Jade'en ja Moisés kyutujk yjawa'añ jøts ja teety pøn yiktso'ondaajkidi ja Leví jøts t'amido'odit ja jaa'y tukpiky ja myajkpikpyi pikta'aky, øy ja tjamigu'ugidi, uk tu'ugyi tjakojpgk'atti ja Abraham. ⁶ Øts ja Melquisedec jade'en yjagateety'aty sam ja'adi pøn yiktso'ondaajkidi ja Leví, y'amidoow ja nayide'en tukpiky ja myajkpikpyi pikta'aky ja Abraham pøn wyinaty ja Dios tø tyamiwanda'agiyi ja øy'ajtin. Jøts ja Melquisedec tkunuu'kxy ja Abraham; ⁷ nipønts sa kyawa'añ, ku ja yjawanimøji pøn kunuu'kxp, jøts ka'ap ja' pøn yikunuu'kxp. ⁸ Tum oo'ktipts ja jaa'y pøn ya naxwiin tukpiky ja myajkpikpyi pikta'aky yikmøodyip, ka'apts ja Dios kyajpxy jade'en tnigajpxy ku ja Melquisedec tø y'oo'kni, nømp ja wya'añ ku ja yjujky'atynim. ⁹ Nayide'en idø'on n'ukwa'anint, øy idø'on ja teetytøjk pøn ja Leví ñigubajk'ajtpy ixyam tjayikmukti tukpiky ja myajkpikpyi pikta'aky, kuwani dø'on ndejint kø'øm tjagubajtmidi ja yjade'embí nay winet ku ja Abraham tmøoy ja yja' ja Melquisedec. ¹⁰ Ja'agøjxp idø'on ja ndejint ja ttuun ku ja tmøjnigojpgk'aty ja Leví pøn wyinaty kaka'xpnim naxwiin, ku ja Abraham ja Melquisedec pyaatsoji.

¹¹ Ja Levíit teety idø'on midi ja Aarón yiktso'ondaajkidi, ja' idø'on tmøodyi ja kutujk ja Israel kajp. Kudsik idø'on jeexyip ya'atpi teety ttukpaattøø ja Dios pøn jaty ja kyutujk paduujnidip, ka'ats jeexyip chøjkyi jøts ja teety

jadu'uk kyaxø'økt midi tkawindsøn'ajttip ja Aarón, jøts nayide'en tyeety'attit sam ja Melquisedec. ¹² Kuwani dø'øn tyigach ja kutujk ku ja teety tyigatsti; ¹³ ni tu'uknimts ja teety kyabidsimy abikyajpkøjxp, sami ja nwindson'ajtim Jesucristo midi dø'øn jade'en yiknigajpxp jap nøkyijxpy. ¹⁴ Yikni ja'wipxi ja' ku ja nwindson'ajtim Jesucristo tatskojpk'aty ja Judá, jøts ka'ap ja Moisés tyikutujky ku teety jam Judá etjotp pyidsø'ømdit.

¹⁵ Jawaani øyts ja ne'egi wyingaxi'iky, ku yiknijawi jøts ku ja Jesús ja jemdyeety'ajtin ñanky'ejxiyi, nayide'en sam ja Melquisedec. ¹⁶ Kyø'øm møk'ajtingøjxp ja Jesucristo tpaajty ja teety'ajtin, ja ku tmøøt'aty ja jujky'ajtin xemikøjxp; jøts ka'ap ja pyidsimy jam ja'a'y agujkp, pøn jaty idø'øn paat'ajtiyip ja teety'ajtin, sam ja kutujk ja'ayi ttanibiktaagi. ¹⁷ Pø yide'enxi ja Dios Teety ja ñigajpxyi:

Mets idø'øn xemikøjxp mdeety'atp,

jøts jade'en mdu'unt sam ja Melquisedec ttuñ.

¹⁸ Paty ja Moisés yjawyeen'ana'amín tø kyudigøy, ku ja møk'ajtin tkayaky sudso yikpadu'unt; ¹⁹ jøts niwine'enin ja ka'øchinaa'yin tø tyiktigach. Ixyamts nmøøt'ajtyindi tu'uk ja jøp'ijxy'ajtin midi øy midi møj jøts midi ja Dios xukpaajtimp.

²⁰ Diosts idø'øn kø'øm ja y'aaw y'ayuujk tø tyaky jøts idø'øn ja nwindson'ajtim Jesucristo xemikøjxp tyeety'att. ²¹ Ja abikpyi teety, ka'ap ja jade'en tø yiktamidsokti sam idø'øn ja nwindson'ajtim Jesucristo tø yiktamidsøky, sam jap jaabyety nøkyijxpy wyā'añ:

Pøni tø ja Dios wyā'añ ka'ap ja y'aaw y'ayuujk

ja tyiktigatst, ku ñiim̄y:

“Mets idø'ø̄n xemikø̄jxp mdeety'ajtp,

jøts jade'en mdu'unt sam ja Melquisedec ttuñ.”

²² Paty idø'ø̄n ja Jesús jawaani tø myøjtøki, ku ja jawaani øy ja tyeety'ajtin̄ midi tyajkp ja nitsoojkin.

²³ Yam janch namay ja jadu'ukpi teety, jøts tum jøpwetsti y'etti ku y'ookti, wenkpits ja tyunk tmidandip; ²⁴ ka'ats ja Jesús jade'en, nijuuni xøøw ja kya'øøky, paty ja tyeety'ajtin̄ ja nipøn tkadukmidañ. ²⁵ Ja'agø̄jxpts idø'ø̄n ja jade'en xemikø̄jxp tyik'awa'atspidsim̄y pøn jaty ja Dios t'ixaadyip, ku ja xemikø̄jxp yjujky'aty jøts ku adøm ejtp xni'amido'owa'am.

²⁶ Ya'atpi teety'ajtpi adøm idø'ø̄n jeky tø n'awijxyim; ja nwindson'ajtim Jesucristo ja' idø'ø̄n øyjaay pøn tkamøøt'ajtp ja ka'øwyinmāā'ñ, ni ja pøky, pøn ja pojkipitumbi jaay tø kyadapaadyi ja ka'øchinaayin øy ja tø tjamøøtsøøni, jøts pøn ja Dios Teety møøt yikutuky. ²⁷ Tø dø'ø̄n ja tu'ugyi ja Dios wyindsø'øk'ajtin̄ tyika'pxi, ku ja ayo'on kø'øm tø tkupiky. Ka'ap ja jade'en tø ttuñ sam ja jadu'ukpi teetyti, pøn jabom ja Dios twindsø'jkidip jøts ja kyø'ømbøky yikmaa'kxtit, jøtsnim̄ ix'oojk ja jaay nayide'en tkugajpxti jøts ja pyøky ja wya'atst̄it. ²⁸ Tum naxwii'ñit jaay ja Moisés y'ana'am̄in yikteety'ajtpy, pøn nayide'en ja pøky øy myimajada'agiyidit; tøts yø'øbi ana'am̄in kyugøxi jøts ja Dios Teety ja yaaw y'ayuujk tø tyaky jøts ja y'U'nk, ja nwindson'ajtim Jesucristo, tø tpikta'aky øy tyeety'ajtpi pøn xemikø̄jxp ja wya'ats'ajtin̄ møøt y'ity.

8

Ja Jesús xkugajpxindip Dios Teety wyingujkp

¹ ¿Midi'ibits idø'øn tsojkip yikxon ja'gyuki? Ja' idø'øn ku adøm ja møjteetywindsøn nmøøt'ajtyim jøts ja jam tø y'ixa'aky Dios Teety y'aga'ngyøjø'øm yikutujkpi, ² jøts ja jam tyeety'aty tsaptøjkjotp midi ja Dios Teety kø'øm tø tkøjy, ka'ap ja ja'a'y ja tø ttukyikøjy. ³ Windsø'øk'ajtin, tamay'ajtin, ja' idø'øn ja teety tyundip, paty idø'øn nayide'en ja nwindsons'ajtim Jesucristo kuwanì pya'at'atyì jøts ja windsø'øk'ajtin tmo'ot ja Dios Teety. ⁴ Ku ja nay ya jeexyip chøøni naxwiiñ, ka'ap ja yjeexyip tyeety'aty, pø jaaxi teety ya pøn jade'en ttundip samì ja Moisés wya'añ. ⁵ Nugo agojnaxts ja abikpyi teetyi myidundip, tum ja' y'agojnax midi jam tsajpjotp. Ja'agøjxp ja jade'en yiknijawì ku Moisés ja Dios ñimaajyi, ku dø'øn ja wyinaty tu'uk ja tsaptøjk tyik'øyiwya'añ, ku yide'en yiknimaay: “Yikxonim x'ext, jøts nayide'en pyidsø'ømt sam tø nduk'ixy kojpkøjxp.” ⁶ Ja øy'ajtin, ja tiy'ajtints adøm ja nmøjteetywindsøn myidumpy, ja'agøjxp ku ja tkugajpxy tkudani ja øy'ajtin, midi adøm ja Dios Teety kø'øm tø xamidsøjkyim.

⁷ Kuk idø'øn jeexyip nisà kya'ejxi ja jawyeen kutujk midi ja Moisés ja Dios tukajpxnajxøø, ka'ats jeexyip jadu'uk chøkyi sam ja Cristo yja' tø tnanky'ijxyi. ⁸ Ja kuxi ja Dios tkaka'pxyjawi ja jawyeen kutujk sam ja kø'øm wya'añ jap nøkyijxpy: Yide'en ja Dios Teety wya'añ: Me'emp ja xøøw ja jumøjt ku øts ja Israelit ja'a'y jøts ja Judajit ja'a'y nmo'odit jadu'uk ja kutujk pøni kyupøjktip.

9 Ka'ap ja jade'en t'ext sam ja' midi tø njatumi møøt ja myigugajp, midi jekyip tsinaadyøø, ku øts ja nwaapidsømdi Egipto y'etjotp; kumi ka'ap ja tpadundi, paty øts ja nmajtstuttøø.

10 Yide'en yjaakwa'añ ja Dios Teety, yide'ents idø'øn ja y'ett, midi øts idø'øn ndunwajnip ja Israelit kajp:

Ndukja'gyukip øts ja øgyutujk ja'adi, jøts øts ja y'anmija'wingøjxp nbiktaajkidit. Ja'ats øts idø'øn niDios'attip, jøts øts ja ngajp'attit.

11 Ka' dø'øn pøn wyinaty ja myigu'uk niti tkadukyikyujti pøni ti dø'øn ja tyu'ump; ja'agøjxp ku øts ja wyinaty ja møj ja mutsk tø nduknijawidi jøts øts ja niduki'iyi x'ejxkaptit.

12 Nmaa'kxidip øts ja' ja kya'øchinaa'yin, jøts nijuuni øts ja pyøky ja nga'ukja'myajtsniyidit.

13 Ku dø'øn ja Dios Teety ja jemy ayuujk ja jemy winmaa'ñ tnigajpxy, mijaa'yinip idø'øn ja myijawyeembi kutujk; kuts ja tø myijaa'yini, pojin ja kyudigøøñit.

9

Ja naxwii'ñit tsaptøjk jøts ja tsajpjotpit tsaptøjk

1 Jamts idø'øn y'ijty tmøøt'aty ja jawyeen kutujk sudso yikwindsøøgit ja Dios jam tsaptøjkjotp midi ya naxwiiñ. 2 Yide'en idø'øn y'øyiyi'ñ ja tsaptøjk ya naxwiiñ, midi dø'øn jawyeen yikpatp ku ndøjka'ant, ja' idø'øn xyøøw'ajtpy Kunuu'kxy Et, japts idø'øn y'etti ja seri adøø'yin, jøts ja pøjkpajt ma

ja kunuu'kxy chapkaaky y'etti. ³ Japts myimajtsk adiidyuky jixki'py tyañ, ja amaagyunuu'kxy et; ⁴ ma jap tu'uk ja altajr midi tum amuum oori ma kyøxøøy ja poom, jøts tu'uk ja mutskaaxi midi oori nimøch ma ja kutujk jap y'ity. Japts mutskaaxijøtpy tu'uk ja tu'jtsu'nk midi tmøøt'ajtp ja maná midi dø'øn yjøø'kxtøø ja israelit jaa'y jam abak etjotp. Nayi jap idø'øn kaaxijøtpy y'ijty ja Aarón ja tyajk midi ojts jadigojk xyimumy, jøts ja tsaá ma jap kyøxja'ayø ja kutujk ja ñi'ayuujk. ⁵ Jamts kaaxi ñikøjxp y'etti ja ankilistøjk ja y'agojnax, midi tyiknigaxø'ktip jøts ku ja Dios jam, jøts ja kyajnk ja ttanimu'uxti ma ja pøky y'ijty yikmee'kxy. Wants ya'at ja'ayi t'uknija'wam.

⁶ Kuts idø'øn ja jade'en tø ttanibiktaagidi, winets idø'øn y'ijty ja teety tyøkidi jap mijawyeen tøjkjøtpy midi Kunuu'kxy Et yiktejp, jøts idø'øn ja windsø'jkin ja yikjujky'ajtpi t'atmo'odi pøni juuni ja kø'øm tsojkin'ajttøø. ⁷ Jøts idø'øn jap myimajtsk tøjkjøtpy midi yiktejp Amaagyunuu'kxy Et, tuk'ojkyits ja winjumøjt ja møjteetywindsøn jap tyøki; ja jiyujk ni'jpy idø'øn ja myidøjkip midi y'atswa'xpy ma ja pyøky jawyeen yikmaa'kxt jøtsnim ja jaa'y yja' nayide'en. ⁸ Yide'ents idø'øn ja Dios Espíritu Santo xukja'gyukam ku dø'øn jap nipøn nugo kyatøki myimajtsk tøjkjøtpy ma txøøw'aty Amaagyunuu'kxy Et. Japyi ja midu'uk tøjkjøtpy ja'ayi xyumitøkidi. ⁹ Yø' adøm idø'øn n'ejxpajtin'ajtimp wine'enin naxwii'ñit jaa'y'ajtyindi, jøts nnija'wa'ant ku ja winmaa'ñ kyawa'ach øy ja wine'en ja wyindsø'jkin tjayika'pxtøø. ¹⁰ Ja' idø'øn ja wyindsø'jkin'ajttip

sudso kya'adyit sudso y'uuktit, jøts sudso ñanky'øyiyidit ñankchujiyidit, sam ja møjaa'y chinaa'yin tyikutuky. Niwine'enin ja anmija'win ja tkayikwa'ats'aty. Ja'ats ja jade'en tyungunajxtip kunim ja Dios kø'øm tø tyiktigach.

¹¹ Tøts idø'øn ja nwindson'ajtim Jesucristo myiñ, ja'ats idø'øn ixyam tñimøjteetywindsøn'ajtp ja jemchinaa'yin midi ya tø tyañ. Jawaani øy idø'øn jøts jawaani tsuj idø'øn ja tsaptøjk mā dø'øn ja tyuñ, ka'ap ja jaa'y ja tkøyy, paty idø'øn ja kyanaxwii'ñit tsaptøjki. ¹² Tø dø'øn ja nwindson'ajtim Jesucristo ñaxy jap myimajtsk tøjkjøtpy midi xyøøw Amaagyunuu'kxy Et, ka'ats ja t'ukmidøjkiñi ja mutsk chiibi ni'jpy jøts ja løjch ñi'jpy; kyø'øm ni'jpy ja myidøjkip tuk'ojkøjxp ja'ayi, midi adøm idø'øn xemikøjxp tø xuktanitsøøjkyim.

¹³ Yikwachptsik idø'øn y'ijty ja pøky ja tsigiduuri ni'jpy, jøts ja tsapaxuna'jk ni'jpy, jøts nayide'en ja tsigivaki jaam midi yiknitøødyip jam altajrkøjxp, ku dø'øn ja y'ijty ñadyaninuugyidi nikijxy jøts ja pøky jade'en tyikwa'atswa'andi xjats ja kunuu'kxin ja jade'en tpattøø. ¹⁴ Pøni jade'ents ja', jawaani kajaats idø'øn ja nwindson'ajtim Jesucristo ja ñi'jpy yikpøkwyā'ach jøts kyunuu'kxy, pø patyxi ja Dios Espiritu Santo køjxp ñagyøyajkiyi pakwyā'ach, midi ja Dios Teety kyupijkpy, jøts idø'øn ja ñi'jpy ja tyikwa'atst ja ka'øchinaa'yin midi ja kudigø'øyin xukpaaajtimp, jøts ja Dios jøts ja yikjujky'ajtpi jade'en nmimado'owin.

¹⁵ Paty idø'øn ja Jesucristo møj yik'ajot'aty ku yjemgyutujk tø tyiktso'onda'aky, pø ja'axi ja kyu'o'jkip jøts yikpøkmyaa'kxtit pøn jaty tø pyøkyundi ku ja møjaa'gyutujk y'ijty tyuñim, jøts

ja jaa'y tpaattit ja xemikøjxpit øy'ajtin, midi ja Dios Teety ttamidsøjkiyidip windi'ixip. ¹⁶ Jabi jade'enxi yiktuñ ku ja maay wya'kxy, jaanim ja wya'kxy ku ja jaa'y y'øøkñim. ¹⁷ Jøts ka'ap ja ayuujk mibaat nugo myøjtøkit pøni nay jujky'ajtpnim ja kumaay. ¹⁸ Kuwanixi ja ni'jpy ojts chuñ xye'kxy ku ja møjaa'gyutujk cho'ondaajky. ¹⁹ Ku dø'øn ja Moisés wyinaty ja kajp tø ttukmadøy ja Dios kyutujk y'ana'amin, winets tnixajiyiñ tukmutsk øøxy ja ujts aay møøt ja tsajpts wet, jøts ttuktaxø'øky ja tsigin'i'jpy ja chiibi ni'jpy, midi nøø wyinaty møøt tø yik'adaamuky, xjats ttanixejtwidity ja kutujk nøky jøts niduki'iyi ja jaa'y nayide'en. ²⁰ Winets wyaañ: "Ya'at ni'jpy idø'øn tyikmøjtøjkip ja Dios kyutujk midi mee tø myiktamidsøky." ²¹ Tyanawa'jx idø'øn ja Moisés ja ni'jpy nayide'en ja tsaptøjk, jøts tuki'iyi pøni ti jaty yiktundip, ku dø'øn ja Dios ja t'atswindsø'øgidi. ²² Jade'en idø'øn kyutukyi jøts ku ja ni'jpy tuki'iyi tyikwa'atst, kuts ja ni'jpy kya'ett ka'ats ja pøky yikmee'kxy.

Cristo y'ayo'ongøjxp ja pøky wya'ach

²³ Paty idø'øn chojki ja ni'jpy jøts wya'atstit ja pikta'aky jap tsaptøjkjøtpy, midi y'agojnax'ajttip ja tsajpjøtpyit tsinaa'yin. Jawaani øy pyaat'atyiyi ja tsajpjøtpit'ajtin ja windsø'øgi, midi ja Cristo kø'øm tø ttuñ. ²⁴ Jøts ka'ap ja Cristo jam tyeety'ajty tsaptøjkjøtp midi ya naxwiñ ja jaa'y tø tkojti, jøts tsajpjøtpit tsaptøjk ja' nugo y'awanax. Jamxi dø'øn ja tymchajpjøtp tø tyøki, mā adøm ja ixyam x'agø'dujkyim x'axajtujkyim Dios Teety wyingujkp. ²⁵ Tuk'ojkyi dø'øn ja Jesucristo ja o'jkin tø tkupiky, ka'ap ja jade'en tø ttuñ sam

ja jadu'ukpi teetywindsøndi midi dø'øn y'ijty winjumøjt ja'ayi tmidøjkip ja ni'jpy jam tsaptøjkjotp jøts ni tkakø'ømni'jpyi ja'adi. ²⁶ Ka'ats idø'øn ja Jesucristo jeexyip nayide'en ttumi, tøts idø'øn ja jeexyip may'oijk y'oo'kni kuyip cho'ondaajky ja naxwii'ñit, ka'ats ja jade'en tø ttuñ. Ixja tø kya'pxy, ixja tø tyiy ja et ja naxwii'ñit, tuk'oijk ja o'jkin ja ja'ayi tø tkupiky jøts ja pøky tuki'iyi xemikøjxp tyikwa'atst. ²⁷ Nayide'en sami jaa'y niduki'iyi tuk'oijk y'oo'kti, jøts yiktiidyu'unditnim, ²⁸ nayide'ents ja Cristo tuk'oiky tø y'øøky, jøts may ja jaa'y tyikwaajtsit ja pyøky. Kuts idø'øn wyinaty jadigojk ñanky'ejxpaadyiyi, ka'ap ja yikpøkyatspi wyinaty y'ukmeni, ja' ja wyinaty ñimimpy pøn jaty ja awejx'ajtiyip.

10

¹ Ja jemgyutujk idø'øn ja' y'aga'ax ja nugo kutujk midi ja Moisés yiktaan, paty idø'øn ja kyamajada'aky nijuuni. Øy ja jiyujk ja namay tjayik'ookti winjumøjt, ka'ats ja pøky ja tyikwa'ach. ² Ku dø'øn ja jeexyip ja pøky tyikwa'ach, jøts ja øchinaa'yin jeexyip tyaky, tuk'oikyits idø'øn ja jeexyip jade'en yjaty. Ka'axi ja jeexyip y'uknabyøkyja'winiyidi. ³ Kumi ka'ats ja yjade'eni pø ximija'myatstipxi ja pyøky ja'adi ku ja winjumøjt tjatundi ja windsø'jkin, ⁴ ja'agøjxpts ja jade'en yjatti ku ja pøky ni ja tsigini'jpy ni ja chiibi ni'jpy tkayikwa'ach nijuuni.

⁵ Paty idø'øn ja Jesucristo ja Dios Teety tnimaay ku ya myiiñ naxwiiñ:

Ka'ats xtsøky'aty jøts myiktawindsø'øgit ja jiyujk,

patyxi øts tø xyikjaa'yjaty jøts øts ja ne'kx jøts øts ja ni'jpy tø xmø'øy.

⁶ Ka' myikjotkujk'atyi ku ja jiyujk yjanitøøy, ni ja windsø'jkin midi jayiktump jøts ja pøky xmaa'kxt.

⁷ Winets ø nwaañ: “Ixyam ø Dios Teety, jøts ø nbadu'unt pøni ti me nmi'ana'amwampy sa jap jaabyety nøkyijxpy y'ity.”

⁸ Ku dø'øn ja jawyeen tø tñigajpxy ku ja Dios Teety tkadajotkujk'aty ja windsø'jkin ku dø'øn ja jaa'y ja jiyujk tjayik'ookti, jøts ku tigati tjayiktøømyidi jøts ja pyøky wya'atstit sam idø'øn ja yjagutujkyi.

⁹ Winets ja nwindson'ajtim Jesucristo wyaañ: “Ixyam ø Dios Teety, jøts ø nbadu'unt pøni ti mdsøjkpy.” Yikudigøøpyts idø'øn ja nwindson'ajtim Jesucristo ja jawyeengutujk jøts ka kyø'øm windsø'jkin ttawinguwijch. ¹⁰ Tøts adøm idø'øn ja Dios xkunuukxyim, pø tøxi ja nwindson'ajtim Jesucristo xemikøjxp tuk'ojkyi ja ñine'kx tkøyaky midi idø'øn ja Dios Teety tø tmø'øy adømjøjxp.

¹¹ Tum jade'ents ja israelit teety tundinim, nay ja jiyujk ja tyawindsø'jkidip ja Dios, øy ja pøky ja nijuuni tjagayikwa'ach. ¹² Tuk'ojkyits ja Jesucristo ja'ayi tø y'øøky jøts adøm ja nbøkwyaaajtsindit, jøts ja jam tø y'ixa'aky yikutujkpi, Dios Teety y'aga'ngyøj'øm. ¹³ Jamts ja y'awixy kunim ja myidsep yikpikta'akt tyekyji'py jøts ja ttekpya'an'att, ¹⁴ pø tøxi ja tu'ugyi ja wyindsø'øk'ajtin ttamajada'aky ku ja kø'øm tø ñadyagidøkiyi ja Dios Teety, jøts jade'en xemikøjxp tø tyik'awa'atspidsimy pøn jaty ja kunuu'kxin tø tmø'øy. ¹⁵ Jøts ja Dios Espíritu Santots ja

kajpxy nayide'en tyiktuu'yø'øpy tyiktuu'wejtsp ku wya'añ yide'en:

¹⁶ Midi øts idø'øn yø jaa'y ndamidsojkip, ku dø'øn ja xøøw ja jumøjt tpaatt, yide'en øts idø'øn ja wyinaty nduñ.

Ndukja'gyukip øts ja ngutujk jøts øts ja nbiktaajkit y'anmija'wingøjxp.

¹⁷ Jøts yjaakwa'añ:

Ka'ap øts ja pyøky ja wyinaty n'ukja'myajtsniyi, ni ja kya'øy'ajtin.

¹⁸ Paty idø'øn nja'gyuka'ant yikxon pøni tø ja pøky xemikøjxp yikmee'kxy, ka'ats y'uktsojkniiyi jøts ja Dios Teety njaaktawindsø'jka'ant o ti jøts ja xpo-jkpimaa'kxint.

Møk ja Dios janchja'win nbiktaajkit

¹⁹ Paty migu'uktøjk idø'øn ka' tsø'øgijawi nwingunøjkxindit ja Dios Teety jap tsajpjøtpy, pø tøxi ja nwindson'ajtim Jesucristo xkudsu'una'am xkudajxa'am.

²⁰ Ja'ayi tsojkip jøts adøm ja nwindson'ajtim Jesucristo ja yjemdyuu'nguyø'øyint midi ttukpatp ja xemikøjxpit jujky'ajtin, jøts midi ja nwindson'ajtim Jesucristo tø awa'ats tyiktañ kyø'øm y'o'jkingøjxp.

²¹ Ja nwindson'ajtim Jesucristots adøm idø'øn nmøjteetywindsøn'ajtyimp jam tsajpjøtp; ²² paty idø'øn tu'ugyi ja n'anmija'win nbiktaajkit ku ja Dios Teety n'ajot'ajtint, jøts tu'ugyi dø'øn ja janchja'win amumjoojt nmøøt'ajtint; pø tøxi ja xyikpøkwyaaajchim jøts adøm nga'uknabyøkyja'wiña'ant, tøts nayide'en ja nøbajtin nøø xyikwaajchindi. ²³ Yikxonimts idø'øn ja n'awejaxint midi ja Dios tø t'agajpxuky ku adøm

ja kyutujk ja tØ ngupijkyim. Pyadu'ump ja' ja y'ayuujk. ²⁴Ja' adøm idø'Øn n'ixa'ayimp sudso xem yam nnabyudøjka'ant jøts nnachojka'ant. ²⁵Ka'ap adøm ja jaa'y chinaa'yin nyikmøjtøjka'ant pøn jaty kamendip ku nnamyujkyandi Dios ajot'ajtpi, nagyajpxjot'amøjkamp adøm idø'Øn ne'egi, ixa ja nwindson'ajtim Jesucristo wyingtoni.

²⁶ Ku adøm kø'Ømdsojkingøjxp ja Dios yja' n'ixmajtsint, ka'ats ja maa'kxujkin yikpaatt, jabi ka'axi ja abiky yiknitsokpi y'ukmenit. ²⁷Ja'ayits adøm njøp'ejxindip pøni jade'en adøm ndsinaa'yin, jøts ja Dios Teety ja myøktidyu'unin nbaajtant, jøts xemikøjxp ja tø'øyin xmø'øyindit midi dø'Øn pyaattip pøn ja Dios tmidsep'ajttip. ²⁸Pø nayide'enxi y'ijty yiktundi pøn tkamimadoodip ja Moisés y'ana'amin, ku namajtsk uk nidigøøk ja a'ejxnaxpi kyajpxti, kuwanits ja y'ijty y'øøky, niwine'en ja kyayik'ayo'ejxti. ²⁹Jawaani kajaats ja pyaat'atyidi ja ayo'on pøn jaty ja Dios U'nk nugo t'uktaa'nwidejtnidip, jøts ja y'o'jkin tka'ukmøjpktaajkniiyidi midi tø yikpojkiwa'achidi, jøts nayide'en ja Dios Espíritu Santo tø t'ukmigajpxigøøñidi yam ja yjaba'ayøyidi. Pø ja y'o'jkinxi ja Cristo y'ejxa'anin'ajtpy ku dø'Øn ja Dios Teety chojkin tø tñigajpxy, midi tø yjayikpøkwa'achidi pøn ja ka'ukmøjpktaajkniiyidip. ³⁰Pø nnija'wampxi ku ja Dios Teety tø wya'añ: “Øts xpaat'ajtp jøts øts ndagubattit ja pyøky; øts yø nmo'odip kija' ja y'ayo'on pøni wine'en yø pyaat'atyidi.” Jøts nayide'en wyami: “Ndiidyu'ump øts ja ngajp.” ³¹ Janch kawinmaañi dø'Øn ja y'ayo'on'ixy

pøn ja Dios, pøn ja yikjujky'ajtpi tyukpatpy myøk'ajtingøjxp ja y'aki!

³² Kidi mee xja'dyigøy ku ja nwindson'ajtim yja' x'eixidi jøts ja chinaa'yin xpadøjkidyøø, winets o sagasa xkujajtidøø ja mjanchja'win. ³³ Jam mee niwinaagin pøn ja mayjaa'y m'eixidi ku myikta'ohti jøts myiktatsee'kti ja mdsinaa'yin, jøts nayide'en xajotmay'lookti ja mmigu'uhti pøn o sagasa yiktundi. ³⁴ M'ayo'eix meets ja tsumyjaa'y, jøts mimadaajk meets ja jotkujk ku ja mbikta'aky tuki'iyi myikpøjkigyøxtøø, pø mnija'wipxi meets ku jam tsajpjotp jawaani y'øybi xpaattit midi xemikøjxp etp. ³⁵ Wan ttuñi pøni ti tuujnip, awejx'et meets ja ejtp pøni ti ja nwindson'ajtim tø t'agajpxuky, myikmo'op meets ja kajaa. ³⁶ Tuda'aky ja Dios Teety y'ana'amin paduñ ttsøky, jøts ja tyakt pøni ti ja tø t'agajpxuky. ³⁷ Pø yide'enxi ja nøky wyā'añ:

Jawaani jaak'awejx'etti,

tsojk ja mye'ent ja nwindson'ajtim pøn ja øy'ajtin xmø'øyimp.

³⁸ Midi'its øts idø'øn ngupijkpy, janchja'wingøjxp idø'øn t'awixy'aty ja øy'ajtin,

pøni windsi'jkyts ja', ka'ats øts ja ndajotkujk'att.

³⁹ Ka'ats adøm nwindsi'jkyjaa'yandi midi pojin yikmimajadaktip, tum ja'abixi adøm pøn ja janchja'win ttajujky'ajttip, jøts jade'en ja n'anmija'win xemikøjxp nyiknitsoojkindit.

11

Ti dø'øn janchja'win'ajtp

¹ Ja' dø'øñ janchja'win'ajtp ku amumjoojt tu'ugyi n'awejsxint pøni ti dø'øñ yikmø'øyimp jøts ku amumjoojt nmibøjkint midi nga'ijxyindip.

² Ja yjanchja'win idø'øñ ja ndeety'amøjtøjk yiktakajxajkti.

³ Ja janchja'win adøm xukmibøjkimp ku ja Dios ja tsajp ja naajx jøts tuki'iyi tø tyik'øyi y'ayuujkøjxp ja'ayi, jøts ja' midi ıxyam n'ijxyindip ka'ap ja y'ity te.

⁴ Janchja'wingøjxp ja Abel øy ja Dios twindsø'jkøø, yam ja Caïn kajade'en, paty ja Dios ja Abel tkupijky jøts ja'agøjxp ja wyindsø'jkin tkupøjki. Ots ja Abel tø yja'oo'kni, tø ja ejxpajtın ja xemikøjxp tyiktañ ku ja janchja'win ja tmøøt'ajty.

⁵ Janchja'wingøjxp ja Enoc yiktaniwawi ja xemikøjxpıt tsinaa'yin øy ja o'jkin ja tjagapaajty, jøts ja tka'ukpatnidi ku tja'ixaadyøø pø tøxi ja Dios ja wyınaty pyawa'anıyi. Yide'ents jap nøkyıjxpy wya'añ ku ja Dios ya naxwiiñ tyikjotkujk'ajty.

⁶ Janch tsepts jøts ja Dios nyikjotkujk'ajtint, pøni ka'ap ja janchja'win yikmøøt'aty, ja kuxi ja Dios yikpaatwa'añ, jawyeen idø'øñ ja njanchja'want ku dø'øñ ja jaa, jøts ku ja nayide'en tkunuu'kxy pøn jaty ja ıxaajıyıyıp.

⁷ Janchja'wingøjxp idø'øñ ja Noé ja Dios tmibijky, jøts tmımadøøy ku ja tyukmadooji pøni ti jaty idø'øñ tunwajnip wyınaty, o dø'øñ nıti kyagaxi'ikñım, jøts ja barki tyik'ø'yıyıı'ñ midi yiknitso'ogıp wine'enın jam tyøjkjotp yjaa'y'atti. Ja yjanchja'win ja tyamøj'ajt jøts ja ttuk'ijxy pøn jaty ja pøky ttunk'ajtıp, jøts nay ja'agøjxp ja Dios tyaxonda'agyı.

⁸ Yjanchja'win ja Abraham yikmadooĵi, ku ja Dios ojts myigajpxyi jøts ja kyajp tmajtstuuĵty, jøts tnidsø'øñ ja naajx ja et midi ja Dios ttamidsoĵki, øy ja tjaganijaawi pøni ma dø'øn ñiĵkxy. ⁹ Ja'agøjxp idø'øn ja Abraham chinaay jam etjotp midi dø'øn ja Dios ttaniwaadsoĵiyi ku janchja'win ja tmøøt'aty, jøts jabyøø'kxyin ja jam chinaay. O magama ja tyøĵk tkoĵwidettøø sam ja tuu'yø'øbyidi. Jøts nayide'en ja y'u'nk Isaac møøt ja Jacob ttundøø, jabi nayide'enxi ja Dios ja tyamiguy'ejxidøø ja naajx ja et. ¹⁰ Ja'agøjxp ja jade'en ttuun ja Abraham, ku tjøp'ijxy'aty ku tyukpaattit ja kajp midi ja Dios kø'øm yik'øyip yikpaadip, ja tsajpjotpit kajp midi tu'ugyi etp.

¹¹ Nay ja janchja'win ojts ja Sara tyukmiĵiky ku ja tu'uk ja y'u'nk tpaatt øy ja wyinaty tø yja'amøĵi kyidakni. Pyaajt idø'øn ja y'u'nk ja ja'agøjxp ku tjanchjaa'wiyii'ñ jade'en sa ja Dios ñimaajyøø. ¹² Ots idø'øn ja ñiyaa'y Abraham yjadyimyøjaa'yini, ojts idø'øn tnigoĵpkteety'aty janch namay ja naxwii'ñit jaa'y, ejxim maadsa', uk ejxim pu' mejy'agø'øm kyamachooni.

¹³ Tum oo'køjxtits yø jaa'y, ixa jade'en tø yikja'myatsti, jøts nika' ja ya naxwiiñ yikmøøgyijxy pøni ti jaty ja Dios wyinaty tø tni'adsowi; ttuk'ejxidits ja jagamyi ja yjanchja'win midi ja Dios yakwanguijxpy jøts jade'en ttaxondaktøø, jøts ja jade'en tnankñija'widøø ku ja ya naxwiiñ nugo ñaxti. ¹⁴ Pønts jade'en ttundip, y'ixaadyipnim idø'øn ja' tu'uk ja kajp ma tu'ugyi chinaañidit. ¹⁵ Kuk ja ttajotmay'oo'knidi ja kyajp midi yiktandi, wimbejtitsik ja jadigoĵk nay jam. ¹⁶ Kumi øgyajpts

ja jawaani ja chojktip midi dø'øn jam tsajpjotp, paty ja Dios jam a'ejxi abaadi tyik'ity tu'uk ja kajp jøts ka'ap ja tyatsø'ødyuñidi, kajpja'wiyidip ja'.

17 Nay ja janchja'win ja Abraham ja Dios ttukmimadooji ku myøkwinmaa'ñ'ejxiyi jøts ja tyu'umts majnk y'amidoojiyi jøts ja Dios ja ttuktawin'oogit. Tø ja Abraham wyinaty tkupiky jøts ja tyu'umts majnk twindsø'jkin'att, o dø'øn ja Dios kø'øm wyinaty tø ñii'mxyi: 18 “Yø Isaac mets idø'øn myikmayiyip.” 19 Ja'agøjxp idø'øn ja Abraham jade'en ttuuñ ku ja twinmay ku ja Dios myøk'ajtin myøji jøts tyikjujkyøkt ja oo'kpi jaa'y. Oo'kpi agujkpy idø'øn ja Abraham ndejint ja y'u'nk wyimbijty jadigojk øy idø'øn ja yjaga'øøky.

20 Janchja'wingøjxp ja Isaac t'agajpxuujky ja kunuu'kxin midi ja y'u'nk Jacob jøts ja Esaú paadidip. 21 Jøts ku ja Jacob wyinaty y'ookwani, janchja'wingøjxp idø'øn ja ttami'awa'anii'ñ jøts ja José y'u'nk y'una'jk tpaattit ja kunuu'kxin. Xjats ojts winda'aky t'ajot'aty ja Dios jøts ja tyajk ojts ñadyagudijiyi. 22 Janchja'win ja José yikwajni, kuk ja israelit jaa'y pyidsø'ømdit Egipto y'etjotp, jøts tni'ana'ami sudso ja pyajk yiktu'unt.

23 Janchja'wingøjxpts ja Moisés ja tyeety tyaak yu'uch yik'ejttø tigøøk po'; ja'agøjxp ku t'ejxti ku ja janch tsuj jøts ka'ap tsø'jkidyøø ja windsøn kyutujk pøn wyinaty tø ñimy jøts ku tuki'iyi ja mutskuna'jk y'ooktit. 24 Jøts nay ja janchja'win ja Moisés kaduktsojki jøts ja Egipto windsøn ñøøx ja taak tejt ku wyinaty tø yaa'dyøjkjatni. 25 Nugo ku ja nayide'en tkupijky pøni sa jaty ja myigu'uk israelit jaa'y yiktundi, jøts ka'ap ne'egi nugo ttaxøøñ ja

naxwiiñ'ajtín midí naxp midí tígøøpy. ²⁶ Jade'en ja wyinmaay ku ne'egi jawaani øy jøts ja Cristo o sagasa tmijatt, midí dø'on yiknigajpx me'emp, ka'ap ja tmøjpiktaajky põni wine'enin jam ja meeñ jøts ja pikta'aky Egipto; ja' y'awijxpy midí ja Dios mo'oijp. ²⁷ Ja janchja'win ja Moisés yiktsoo'nøø jam Egipto etjotp, ka'ap ttsø'jkijñ ja windsøn y'aki, nugo ku ja tpadunguixy ja y'øwyinmaa'ñ ejximdam ja Dios ja jeexyip tyimy'ixy.

²⁸ Janchja'wingøjxp ja Moisés tyiktso'onda'aky ja paski xøøw ku tyikutujky jøts ja israelit jaa'y ja ni'jpy ttawinja'adit ja tyøjk'agaj, jøts ja yjagyobi majnk ka'ap ja Dios Teety y'ankilis yik'oogidit sam ja Egipto jaa'y yjajttøø. ²⁹ Janchja'wingøjxpts ja israelit jaa'y ttanaxti ja Tsajpts Mejy ejxim jaa'y yø'øy tø'øts naxkøjxp; kuts ja egiptit jaa'y nayide'en tjatunwandøø winets ja ñøjøø'kxti niduki'iyi.

³⁰ Janchja'wingøjxpts ojts ja Jericó kajp ja ñawaap kyidaagijxy, ku ja israelit jaa'y wixujk xøøw ja kajp tni'awidejttøø. ³¹ Jøts nayi janchja'wingøjxp ja Rahab, ja ka'ødyø'øxyøjk, ojts møøt kya'øøky põn tkamimadoodip ja myigugajp, ku ja wyinaty øy tsuj tø twindsø'øgi ja israelit jaa'y põn kajptøjkidi ejxpi koobi.

³² ¿Ti jaty ø njaakmadya'akp? Ka'ap ja et ja xøøw ñibaadi ku ø nnimadyaktøkit ja Gedeón, ja Barac, ja Sansón, ja Jefté, ja David, ja Samuel jøts ja jaa'dyi midí y'ijty ja Dios y'aaaw y'ayuujk'ajtpy ku ti tñigajpxwa'añ. ³³ Janchja'wingøjxp idø'on yø tø tmimajada'akti ja wenk kajp, jøts tiy øy tø kyudunk'atti jøts ja Dios ja pyudøjkin tø tpaatti sa ja wyinaty tø tni'adsowi. Ja møj kaa jadi'iñi

tø t'apanmujkidi ja y'apajk, ³⁴ jøts ja møj jøøn nayide'en tø tmimajada'akti, jøts tsujx kumy tø kya'ookti. Jøts tø yjotmøkpøkti pøn kajotmøkti, jøts ja y'awa'ambi midsep tø tmimajada'akti. ³⁵ Jam idø'øn ja tø'øxyøjk pøn janchja'wingøjxp ja ñiyaa'y tø t'ejxpaatti jadigojk jujky.

Mayts y'oo'kmidi ayo'on agujkp, jade'en idø'øn ja ne'egi ttsoktøø jøts ka'ap ja Dios yja' t'ixmajtsidøø ja'agøjxp ku ja t'awejx'atti ja jujky'ajtin xemikøjxp. ³⁶ Jøts may nayide'en yikxon tø yiktaxe'ekti jøts tø yikwopti, jøts ja pujxkuwøøn tø yikpitaajkidi jøts tø yiktsumdi. ³⁷ Jøts nayide'en tø tsaaga'ach y'oo'kmidi, uk tapoodits, jøts tø yikmøjwinmaa'ñ'ejxti, jøts tsujxkøjxp tø y'oo'kmidi; jøts ja borreegi'ak jøts ja chiibi'ak yik'ayowim tmiwidejttøø, o sagasa ja ayo'on tpaattøø. ³⁸ Ja'abi jaa'y idø'øn tø wyidetti abak etjotp, kojpkøjxp, jøts tsaā ankjøtpy, tsaā jutjøtpy. Niwine'en ja naxwii'ñit jaa'y ja'abi jaa'y kyapaat'atyiyi. ³⁹ Ots idø'øn yø øy tsuj tø yik'ejxti yikpaatti ku janch møj ja yjanchja'win, ka'ap yø ti tø yikmo'odi pøni ti dø'øn ja Dios tø t'uknigajpxy; ⁴⁰ pø tøxi ja ttanibiktaagi kø'øm jawaani øy jøts ja y'øbyidsø'ømdit adøm møøt.

12

Ja Jesús adøm n'ejxpajt'ajtimp

¹ Janch mayts adøm ja jaa'y nniija'wa'andi pøn jaty ja janchja'win tø tmøøt'atti jøts ja tø tnankñigaxi'igyidi. Wants adøm tmajtstuujtna'am tuki'iyi pøni ti jaty xyikjotkøjximp, jøts ja pøky nayide'en nmajtstuujtint midi

yjawⁱ xyikpak'amujkna'amp, jøts yikxon njaakpadungojindit tuda'aky ja øchinaa'yin. ² Ja Jesús adøm n'ejxpajt'ajtimp pøn ja janchja'win tyajkp jøts pøn nayide'en tjaakyik'øyip jøts tjaakyiktsujip. Tø ja Jesús jam kruskøjxp y'øøky, ots ja yjatsø'dyuhn, ja'abi o'jkin ka'ap ja tø tmøjpikta'aky, pø ñija'wipxi ja' ku ja ayo'on ja ttanaxt jøts ja tpaatt ja jotkujk'ajtin ja xondaajkin; jøts ja tø y'ixa'aky yikutujkpi møøt ja Dios Teety jam y'aga'ngyøjø'm.

³ Paty mee kidi mjotkixy ni mga'amutskidit, ja Jesús meets ja'myats jøts ja xni'ejxu'uttit ku pojkipitumbi kyøjø'm kawinø'on tø y'ayo'ombaaty. ⁴ Ka'anin meets ja pøky xmøøtseptuhn jøts xkudaxit. ⁵ ¿Uk tø meets idø'on ja xja'dyigøøñi sa adøm Dios Teety y'u'ngin xja'ane'emyindi? Pø yide'enxi jap jaabyety nøkyijxpy:

U'nk, kupøk ja ayo'on midi ndaniguejxpy jøts mdsinaa'yin xyiktigatst, jøts kidi x'ayooji ku me n'ojt.

⁶ Pø tum ja'axi øts ja chinaa'yin tigach ndamidsojky pøn jaty ø ndsojky, jøts ja ayo'on nmøøy pøn jaty n'u'nk'ajtpy.

⁷ Midani meets idø'on ja ayo'on, pø ja'agøjxpxi meets ja Dios ja mmøøyi ku y'u'nk y'unajkin mdsøkyidi. ¿Uk jaa dø'on ja jaa'y pøn nijuuni ja tyety tø kyakajpxwijyi? ⁸ Pøni ka'ats meets ja Dios mgajpxwijyi sami dø'on ja y'unck y'unajk ja ttamidsojky, mga'u'nktejpts meets idø'on ja', wenk u'nk meets ja mdijyiyi. ⁹ Nayide'enxi mutskyi ja ndeety ndaak tø xkajpxwijyindi, jøts adøm ja y'ijty øy tsuj nmigajpxyindi, yayits

ja y'ana'amín ja yjatundi naxwiiñ. ¿Sudsots adøm idø'øn ja Dios Teety midi jam tsajpjotp ngagupøjkint ja kyajpxwejin? Pø ja juky'ajtinxi adøm ja xukpaatwa'animp. ¹⁰ Ja'ayi adøm ja ndeety ndaak xakajpxwejin dip pøni sudso dø'øn ja tja'gyukidi ku ja tsinaa'yin tyiyi ya naxwiiñ; kuts ja Dios x'ane'emyindi, tiyts ja y'ane'emy, jøts ja' ja xani'ana'amindip sudso ja wa'ats'ajtin nbaajitint nayide'en sam ja'. ¹¹ Nipøn ja ayo'on tjanchjagatsøky ku ja yikpaaty, janch møk ja yikjawi; pønts ja ayo'on pønts ja kastigi tpattip, ku wyejti kyajti, ja'ats idø'øn ja chinaa'yin tiy tsuj tyikyø'odyip, ka' ti, ka' sa, ka'ap ja tsep.

Ja ayo'on ku ja Dios kyajpxy kyayikmimadøy

¹² Yikmøkpøkti mgø' mdeky pøni tø ja y'anuu'kxyinidi. ¹³ Ixa'adi ja tiy'ajtindi jøts ja mmigu'uk pøn ja yjanchja'win kamøktinim mba'ejxiyidit jøts ja kyatuu'tigø'odyit, jøts ja jade'en ne'egi yjotmøkpøktit.

¹⁴ Øy tsujim ja mdsinaa'yin xyikyø'odyit, tuda'aky ja jaa'y niduki'iyi møøt mdsøønidit; ku wyinaty jade'en mgajaa'y'atti sudsots ja Dios x'ejxtit, pø ka'axi jadi'iñi nugo ñiyik'ixy ñiyikpaaty. ¹⁵ Yikxonim wanidi, ejxim xka'ukpatnidi ja kyunuu'kxin midi ja Dios pya'ayo'ajtingøjxp mmo'owajnidip, øy ja jade'en tø yja'ukwa'añ ku ja mbudøkiyidit; kidim ta'am ujtsin mnabyikta'agyidi midi pa'amdump jøts ni xkayiktsokmi ja mmigu'uk. ¹⁶ Kidi nugo mnamyøøt'atyidi pøni ka'adam ja xniyaa'yidi xnidø'øxyidi, tum ja Dios yja' ne'egi mjotmay'attip; kidi Esaújin xundi pøn nugo

y'u'nk ttaguyajt ja yjagyoo*bi*, tukte*xy* ja tok*x* ja'ayi ttagu*g*ø*y*. ¹⁷ Mnijawidip*xi* ja nayide'en ku ja Esaú ja tyeety kya'ukmøø'ñiyi ja kunuu'kxi*n* ku ja tja'uk'amidoonaa; øy ja wyinmaa'ñ ja tja'uktayaaxnaa ni sudso ja kya'ukyikmøøña*a* ja kunuu'kxi*n*.

¹⁸ Ka'an*im* meets idø'ø*n* ja Dios myøk'ajt*in* nayide'en xpaajti sam adø*m* ndeety'amøj t'ejxti ku ja kojpk Sinaí ñitøøwyidity. Ni ja xaachkoots meets xka'ijxñ*im* ma ja anaaw ja widsuk adsø'jkibim wyidity, ¹⁹ jøts nayide'en ka' xmadowdin*im* ja pujxujx midi yjawi xyiknajtimp ku ja nmado'owint, jøts nika' ja ayuujk tø xmadowdin*im* janch møk midi dø'ø*n* kyamidanaadyi ja jaa'y jøts yjanuu'kxaknidi, jøts jade'en jya'ukyikmigajpxnidit. ²⁰ Ja'agøjxp idø'ø*n* ja jade'en ku ja adsø'jkibim ja kutujk yikmøødyi midi wamp: “Pøni pøn yø kojpk tyømpy pyatpy yika'tspa'ookp inet ja', uk yikumba'ookp øyi yjajiyujki.” ²¹ Janch adsø'jkibim idø'ø*n* ja t'ejxti tuki'iyi, ja sa Moisés paat kø'ø*m* wyaañ: “Xjanchyikmibejpnip øts ya'at et.”

²² Ka'ats meets, ja Dios kyunuu'kxy'et jade'en tø xpaatti, jabi jotkujkxi meets ja Dios ja yikjujky'ajtpi y'øy'ajt*in* tø x'ejxi møøt ja y'ankilis kamachooni ²³ pøn ja Dios twin'øøgunajxtip. Tøts nayide'en xpaatti pøn ja Cristo tø tjanchja'wimyidi pøn ja ñitso'ok'ajt*in* abaadi awejxnidip. Ja Dios meets idø'ø*n* tø xwingunøjkxidi midi dø'ø*n* niduki'iyi ttidyungøxp, jøts ja øyjaa'y'oo'kpi y'anmija'win midi ja Dios jam møøt chinaañidi, nayide'en meets ja møøt ja

winmaa'ñ xyikyø'øñidi. ²⁴ Jøts ja Jesús tø xpatmidi pøn jam Dios Teety wyingujkp xkugajpxindip pøn ja ñi'jpy xnitanaa'yindip. Ka' xukpøky'ajtyim ja y'o'jkin, ja maa'kxujkin ja ne'egi yajkpy jøts ka'ap ja Abel y'o'jkin jade'en.

²⁵ Paty idø'øn yikxon x'ejxtit jøts ja kyajpxy y'ayuujk xku'oojkidit, pø kuwanixi ja y'ayo'ombaatti pøn jaty ja Dios kyugajpxy tkamimadoodøø. Jawaani kajaats adøm xpaat'ajtint ja ayo'on, pøni ka'ap adøm ja Dios kyajpxy nmadooja'am ku adøm ja tsajpjotp kø'øm xjamigajpxyim. ²⁶ Ojts idø'øn ja møk ujk ñajxy ku ja Dios kyajpxy jam Sinaí kojpkøjxp. Yide'en ixyam ja y'ayuujk wya'añ jadigojk: “Ku øts wyinaty jadigojk ja ujk nyikmiñ ka'ap ja naajx ja'ayi y'adø'tst, nayide'enxi ja tsajp y'adøtsmit.” ²⁷ Ku dø'øn ja Dios wya'añ ku tyik'adø'tst ja'ayi jadigojk tuki'iyi, ja' idø'øn ja tyijpy ku ja tuki'iyi tyikudigø'ty midi jaty jawyeen tø tyik'øyi. Ka'ats ja sa yjattit midi xemikøjxp ja chinaa'yin tø yiktanibiktaagi. ²⁸ Ja'abi øy'ajtints adøm idø'øn ja Dios tø xamidsøjkyim, ka'ats idø'øn ja nijuuni sa yjatt, xemikøjxp idø'øn ja y'ett. Paty adøm ja Dios ngajxajkint, jøts øy tsuj nwindso'jka'ant pøni sa dø'øn ja pyaat'aty jøts pøni sa dø'øn ja ttsøky; ²⁹ pø ja' kuxi adøm ja nDios jade'en yikwindigøy sami jøøn.

13

Sudso tsinaa'yingøjxp ja Dios nwindso'jka'ant

¹ Kidim xja'dyigøydi, ejtpim mnachokidit xem yam Cristo køjxp. ² Kidim xja'dyigøydi, jøts ejtp xtøjkmo'odit pøn jaty mdøjkjotp ja'ttip, pø mayxi

jade'en tø yjatti ku ja jabyøø'kxy ja tyikpoo'kxti, ja Diostam idø'øñ ja y'ankilis ja yikpoo'kxtip øy ja tjaganijawidi.

³ Nayide'en ja tsumyjaa'y xja'myatstít ejximdam meets jeexyíp mdsumyi. Ja'myatsti pøn jaty ja chinaa'yin tø tkuwanjatídi jabi mnija'widípxi pøni sa dø'øñ ja'abi ayo'on.

⁴ Yikxonim x'ejx'ettit m'amajstk'ajtin jøts øy tsuj mnamyøøt'atídit, tyiidyumpy ja Dios ja wyinaty pøn jaty namyøøt'atídiip jadi'íñi yam ja tkaniaa'yi uk tkanidø'øxyi.

⁵ Kidi ja meñ ni ja pikta'aky nugo mganadyapikmyo'ojídit; tajotkujk'atti pøni ti jam mmøøt'ajttip pø tøxi ja Dios wya'añ: “Nijuuni me ngaja'dyigø'ty, ni nga'ixmatst.” ⁶ Paty adøm nwa'anint jotkujk:

“Ja ndeety'ajtim øts idø'øñ xpudøjkíp, ka'ap øts ja ndsø'øgit pøni sa xunwa'añ tu'uk ja jaa'y.”

⁷ Kidi xja'dyigøydi pøn jaty tø mgajpxwiijyídi jøts ja Dios y'ayuujk tø mdukmadøyídi; pawinmaydi sa ja chinaa'yin tø tyikøxti tyikubatti, jøts tundi jade'en sa ja yjanchja'win ja'adi.

⁸ Tu'ugyi dø'øñ ja Jesucristo y'ity, nay ja' jekyíp, nay ja'ats ixyam, nay ja'ats wyinaty xemikøjxp ejtp. ⁹ Paty idø'øñ xkamibøktit pøni ti jaty abiky jøts tigach mjayiktukmadoodíp. Dios y'øy'ajtingøjpxxi ja anmija'win y'øy'aty jøts ka'ap ja ja'agøjxp ku yikpaduñ sudso kya'pxy ja ka'ayin ja uujkin, jabi nijuunixi ya'atpi tsinaa'yin ja øy'ajtin tø tyukpaadyídi pøn jaty ja øy tjanchjabadundíp.

10 Jawaani øy adøm nwindso'jkin jøts ka' mibaat twindsø'jkin'attit ja møjteetywindsøndi pøn ja møjaa'gyutujk tyiktundipnim. 11 Ku ja møjteetywindsøn tyoxti ja jiyujk ni'jpy Amaagyunuu'kxy Tøjkjotp jøts ja pøky wya'atst, kajp pa'am ja jiyujk nine'kx ja tyiknøjkxti jøts ja jam tyiknitødyi. 12 Nayide'ents idø'øn ja Cristo kø'øm y'o'jky kajp pa'am jøts ja naxwii'ñit jaa'y ttagunuu'kxy ja kyø'øm ni'jpy. 13 Wants t'ixmajtsnandi ja møjaa'gyutujk jøts ja Cristo n'anøjkxandit, øy ja sa njaguwanjajtandi sam ja yjajty. 14 Pø ka'axi adøm ya naxwiiñ ja tsinaa'yin xemikøjxp nmøøt'ajtyindi, n'ixa'ayindipnimxi adøm ja' midi dø'øn me'empnim ja'atpnim. 15 Ja Jesucristo adøm ja y'o'jkin xpudøjka'amp jøts ja Dios Teety ejtp nyikjotkujk'ajtint ku ja kyø'øm U'nk ja ndawindsø'jka'ant; jøts nayide'en ja Dios ja n'aa'w ja n'ayujk ndadaxondaajkint. 16 Jøts kidi xja'dyigøydi ku ja Dios nayide'en twindsø'jkinjawi ku ja mbikta'aky xem yam mnadyabudøkiyidi.

17 Mimadowdi pøn jaty mgajpxwejidip; pø ja'axi dø'øn m'anmija'win t'eix'ejttip jøts ñija'widip ja' ku ja Dios ja wyinaty nay ja' tyamachidi. Pudøkidi jøts jotkujk mmøøtunidit, kidi ayowim xundi, pø ni meetsxi wyinaty jotkujk mgatsøøni.

18 Ni'amido'ojik øøts, nibøktso'owik øøts, nitiixi ngapøkyjawi jøts jade'en øøts ja ndsojkin wya'añ ku ja n'anmija'win wa'ats jade'eñim y'ett. 19 Tundi may'ajt jøts øts jawaani møk xni'amidoowidit jøts wyinaty nnabyaatkojma'andi tsojk.

Yikyajkp ja kunuu'kxin jøts ja kajpxpoo'kxin

20-21 Ja Dios Teety, pøn ja øy'ajtin tyajkp, ja' mgunuu'kxidip mguwa'anidip, jøts nwindson'ajtim ja y'o'jkin mdabudøkiyidit jøts øy tsuj mdsøonidit mdanidit jøts ndungøjxindit pøni ti tø xamidsojkyim. Mutsk borreegi u'ngin adøm idø'øn ja nwindson'ajtim Jesucristo x'ejx'ijtyindi pøn ja ñi'jpy tø tyaky jøts ja Dios Teety kyajpxy tø tyik'adujki, pøn adøm idø'øn xkøjø'ømit'ajtim, øy ja ti xmø'øyint pøni ti jaty ja xamidsojkimp. Øy'ajtin agujkp ja Cristo xemikøjxp y'lett. Jade'en idø'øn ja y'ejxi.

22 Migu'uktøjkti, tuda'aky waani ya'at nøky xpa'ejxtit jøts xja'gyukidit ti dø'øn nda'ana'amdip. Winmadowdi waani ya'at ayuujk, øy idø'øn yø wine'en kyidyimgyajaaji. 23 Nijawidi ku adøm nmigu'uk Timoteo tø pyuxøjktøjkpidsimy; pøni nabyaajtíp øø pojin, nmøøtnøjkxp øts ja wyinaty.

24 Kajpxpoo'kxti pøn jaty m'ana'amidip jøts niduki'iyi ja janchja'wibitøjkti. Nayide'en mguejxyidi ja kajpxpoo'kxin ja Italiit jaa'y.

25 Mbaattíp ja Dios kyunuu'kxin niwine'enin jam mdsøonidi. Jade'en idø'øn ja yjatt.

**Ja ɔgyajpxy ja ɔmyadya'aky midi xukpaajtimp
ja nitso'ok'ajtin
New Testament in Mixe, Tlahuitoltepec
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

422dcf73-46a5-5403-b423-8406ed76ac1d